

N A C R T

Na osnovu člana 60. Zakona o komunalnim djelatnostima („Službeni glasnik Unsko-sanskog kantona“, broj: 4/11, 11/11, 6/12, 13/12 i 14/17), člana 16. Zakona o vodama („Službeni glasnik Unsko-sanskog kantona“, broj: 4/11) i člana 35. stav (1) Statuta Grada Bihaća („Službeni glasnik Grada Bihaća“, broj: 13/15, 13/18), Gradsko vijeće Bihać na _____ sjednici održanoj dana _____ 2021. godine, donijelo je:

ODLUKU

o izgradnji, održavanju, korištenju i upravljanju lokalnim vodovodima i javnim česmama na području Grada Bihaća

DIO PRVI – OPŠTE ODREDBE

Član 1.

(Predmet Odluke)

(1) Odlukom o izgradnji, održavanju, korištenju i upravljanju lokalnim vodovodima i javnim česmama na području Grada Bihaća (u daljem tekstu: Odluka), uređuje se izgradnja, održavanje, upravljanje lokalnim vodovodima i javnim česmama na području Grada Bihaća, nadzor nad provođenjem Odluke, kaznene odredbe za nepoštivanje odredaba Odluke.

(2) Ovom Odlukom uređuje se i preuzimanje postojećih lokalnih vodovoda i javnih česmi od strane Grada Bihaća (u daljem tekstu: Grad) i povjeravanje na upravljanje i održavanje davaocu usluge snabdijevanja pitkom vodom putem lokalnog vodovoda.

Član 2.

(Značenje pojmova)

Pojedini izrazi upotrebljeni u ovoj Odluci imaju sljedeće značenje:

a) Lokalni vodovod je samostalni sistem snabdijevanja pitkom vodom, izvan javnog vodovodnog sistema, koji služi za snabdijevanje pitkom vodom lokalnog stanovništva i drugih subjekata i koji ima uređeno izvorište zaštićeno od zagađenja, kaptažu, uređaj za dezinfekciju vode, rezervoar, pumpnu stanicu i vodovodnu mrežu.

b) Javna česma je pojedinačni objekat koji služi za javno korištenje pitkom vodom lokalnog stanovništva i prolaznika koji ima odgovarajući uređaj za crpljenje vode i za zaštitu od zagađenja, a mogu biti priključene na javni vodovodni sistem ili lokalni vodovod.

c) Izgradnjom lokalnog vodovoda i javnih česmi se smatraju radovi izgradnje, rekonstrukcije, sanacije, dogradnje i legalizacije postojećih lokalnih vodovoda i javnih česmi.

d) Upravljanje lokalnim vodovodom je poduzimanje mjera i aktivnosti u svrhu održavanja objekata i uređaja lokalnog vodovoda u ispravnom i funkcionalnom stanju, čuvanja od oštećenja ili uništenja, te rekonstrukcije i dogradnje u skladu s potrebama korisnika.

Član 3.

(Površinska i podzemna izvorišta)

Izvorišta koja se zahvataju za snabdijevanje pitkom vodom putem lokalnog vodovoda mogu biti površinska ili podzemna, a moraju biti takva da imaju količine vode dovoljne da se obezbijedi neprekidno snabdijevanje pitkom vodom cijele godine, te da svojim zahvatom ne narušavaju ekološki sistem.

Član 4.

(Objekti i uređaji lokalnog vodovoda)

(1)Objektima i uređajima lokalnog vodovoda smatraju se: izvorišta, objekti za zahvatanje vode, objekti i uređaji za prečišćavanje, kondicioniranje i dezinfekciju vode, crpna postrojenja, rezervoari i vodovodna mreža, koju čine cjevovodi, ulična razvodna mreža i priključci na lokalni vodovod do mjernog uređaja korisnika usluge, uključujući i mjerni uređaj.

(2)Tehničko jedinstvo sistema snabdijevanja pitkom vodom putem lokalnog vodovoda ostvaruje se povezivanjem objekata i uređaja iz stava (1) ovog člana.

(3)Svi objekti i uređaji lokalnog vodovoda moraju imati sve propisane dijelove i biti u ispravnom stanju.

Član 5.

(Davalac usluge)

Davalac usluge snabdijevanja pitkom vodom putem lokalnog vodovoda je subjekt kojem Grad, nakon preuzimanja, povjeri na upravljanje i održavanje lokalni vodovod, u skladu sa odredbama člana 11. i člana 13. Zakona o komunalnim djelatnostima (daljem tekstu: davalac usluge).

Član 6.

(Korisnik usluge)

Korisnik usluge snabdijevanja pitkom vodom putem lokalnog vodovoda je fizičko ili pravno lice koje se snabdijeva pitkom vodom putem lokalnog vodovoda i koje je sa davaocem usluge zaključilo ugovor o pružanju, odnosno korištenju te usluge (u daljem tekstu: korisnik usluge).

Član 7.

(Predavanje lokalnih vodovoda na upravljanje i održavanje)

Lokalni vodovodi koji su izgrađeni i koji se koriste do dana stupanja na snagu ove Odluke, bez obzira čijim su sredstvima izgrađeni, predat će se Gradu na daljnje upravljanje i održavanje, u skladu sa odredbom člana 60. stav (3) Zakona o komunalnim djelatnostima, te odredbama ove Odluke.

DIO DRUGI – IZGRADNJA, REKONSTRUKCIJA I SANACIJA OBJEKATA LOKALNOG VODOVODA

Član 8.

(Izgradnja, rekonstrukcija i sanacija)

Izgradnja novih, te rekonstrukcija i sanacija postojećih objekata lokalnog vodovoda vrši se na osnovu izdatog odobrenja za građenje u skladu sa propisima koji regulišu oblast prostornog uređenja i građenja i pod uslovima određenim u izdatom vodnom aktu.

Član 9.

(Investitor kod izgradnje, rekonstrukcije i sanacije)

(1) Investitor za izgradnju objekata lokalnog vodovoda iz ove Odluke može biti mjesna zajednica ili grupa građana putem mjesne zajednice.

(2) Ako je investitor grupa građana, priprema i izgradnja objekata lokalnog vodovoda može se provesti samo na osnovu pisane saglasnosti mjesne zajednice i nadležne gradske službe na čijem je području planirana.

(3) Investitor za rekonstrukciju i sanaciju objekata lokalnog vodovoda je davalac usluge.

Član 10.

(Rješenje)

Izgradnja lokalnog vodovoda vrši se na osnovu izdatog odobrenja za građenje.

Član 11.

(Legalizacija)

(1) Za lokalni vodovod ili neki od objekata lokalnog vodovoda koji je bespravno izgrađen, može se, u skladu sa Zakonom o prostornom uređenju i građenju – prečišćeni tekst („Službeni

glasnik Unsko-sanskog kantona“, broj: 12/13, 3/16), naknadno izdati odobrenje za građenje, odnosno odgovarajuće uvjerenje organa nadležnog za poslove građenja, ako su s obzirom na namjenu, veličinu, položaj, ispravnost i druge karakteristike objekta, ispunjeni uslovi za izdavanje tih akata.

(2)Legalizacija lokalnog vodovoda ili nekog od objekata lokalnog vodovoda je, u smislu ove Odluke, naknadno pribavljanje odobrenja za građenje za lokalni vodovod ili neki od objekata lokalnog vodovoda koji je bespravno izgrađen.

DIO TREĆI - UPRAVLJANJE I KORIŠTENJE LOKALNOG VODOVODA

Član 12.

(Upravljanje lokalnim vodovodom)

Upravljanje lokalnim vodovodom podrazumijeva poduzimanje mjera i aktivnosti u svrhu održavanja objekata i uređaja lokalnog vodovoda u ispravnom i funkcionalnom stanju, čuvanja od oštećenja ili uništenja, te rekonstrukcije i dogradnje u skladu sa potrebama korisnika.

Član 13.

(Preuzimanje i održavanje lokalnih vodovoda)

(1)Grad će, u skladu s odredbom člana 60. stava (3) Zakona o komunalnim djelatnostima, preuzeti na upravljanje i održavanje sve lokalne vodovode i javne česme koji su izgrađeni i koji se koriste do dana stupanja na snagu ove Odluke.

(2)Preuzimanje iz stava (1) ovog člana Grad će vršiti donošenjem rješenja za svaki pojedini lokalni vodovod.

(3)Odnosi između investitora i Grada vezani za preuzimanje lokalnog vodovoda regulišu se ugovorom o preuzimanju lokalnog vodovoda.

Član 14.

(Upravljanje i održavanje legalno izgrađenih lokalnih vodovoda)

Svim lokalnim vodovodima koji budu legalno izgrađeni i pušteni u upotrebu nakon stupanja na snagu ove Odluke upravlja i održava ih Grad, odnosno pravni subjekt kojem je Grad povjerio lokalni vodovod na upravljanje i održavanje.

Član 15.

(Vođenje službene evidencije)

Služba nadležna za komunalne poslove i davalac usluge kojem je Grad povjerio na upravljanje i održavanje lokalne vodovode i javne česme, dužni su uspostaviti i voditi evidenciju

o postojećim lokalnim vodovodima i javnim česmama na svom području, te evedentirati sve promjene koje u vezi njih nastupe.

Član 16.

(Izrada elabora stanja lokalnih vodovoda)

Grad će izraditi elaborat stanja lokalnih vodovoda, koji će sadržavati podatke o stanju objekata i uređaja lokalnog vodovoda, o potrebnim radovima i aktivnostima na legalizaciji objekata i uređaja lokalnog vodovoda, te podatke o predviđenim nužnim troškovima legalizacije tih objekata i uređaja, a koji padaju na teret Grada.

Član 17.

(Sredstva kod legalizacije uređaja i objekata lokalnih vodovoda)

(1) Grad će predvidjeti, u skladu sa odredbom člana 37. Zakona o komunalnim djelatnostima, te potrebama utvrđenim elaboratom iz člana 16. ove Odluke, sredstva za legalizaciju uređaja i objekata lokalnih vodovoda koje je preuzela ili treba da preuzme na upravljanje i održavanje.

(2) Sufinanciranje legalizacije uređaja i objekata iz stava 2. ovog člana Grad uređuje Godišnjim programom izgradnje objekata i uređaja komunalne infrastrukture iz člana 55. stav (1) Zakona o komunalnim djelatnostima.

(3) Sufinanciranje može trajati najviše godinu dana od dana donošenja Programa.

Član 18.

(Zabrana korištenja ne preuzetih lokalnih vodovoda)

Za objekte i uređaje lokalnog vodovoda koji nakon preuzimanja od strane Grada ne budu legalizirani, jer nisu dovedeni u stanje ispravnosti minimalno potrebno za pribavljanje dozvole za građenje, nadležna gradska služba donosi rješenje o zabrani korištenja (stavljanju van upotrebe).

Član 19.

(Povjeravanje upravljanja i održavanja lokalnog vodovoda)

(1) Preuzete objekte i uređaje lokalnog vodovoda Grad povjerava na upravljanje i održavanje subjektu koji, u skladu sa odredbama člana 11. i člana 13. Zakona o komunalnim djelatnostima, može obavljati komunalne djelatnosti.

(2) Povjeravanje upravljanja i održavanja lokalnog vodovoda privrednom društvu ili obrtniku Grad vrši zaključivanjem ugovora o povjeravanju obavljanja komunalne djelatnosti snabdijevanja pitkom vodom putem lokalnog vodovoda sa tim licima.

Član 20.

(Knjigovodstveno vođenje i iskazivanje troškova)

(1)Davalac usluge knjigovodstveno će voditi i iskazivati troškove obavljanja te djelatnosti odvojeno od drugih djelatnosti koje obavlja.

(2)U skladu s mogućnostima, davalac usluge i operativno će odvojiti djelatnost iz stava (1) ovog člana od ostalih djelatnosti koje obavlja.

Član 21.

(Upravljanje lokalnim vodovodom do preuzimanja od strane Grada)

Sve do preuzimanja lokalnog vodovoda od strane Grada, kako je definisano članom 19. ove Odluke, lokalnim vodovodom upravljaju investitori.

Član 22.

(Zaključenje ugovora između davaoca i korisnika)

U skladu sa odredbom člana 25. Zakona o komunalnim djelatnostima, davalac usluge dužan je ponuditi korisnicima usluge zaključenje ugovora kojim će se utvrditi međusobna prava i obaveze između davaoca i korisnika komunalne usluge.

Član 23.

(Obaveze korisnika usluge za ugradnju vodomjera)

(1)Svaki korisnik lokalnog vodovoda mora imati ugrađene vodomjere za svaku građevinu priključenu na lokalni vodovod.

(2)Kako bi se spriječili gubici vode i druge štete, svaki korisnik lokalnog vodovoda dužan je poduzimati sve razumne mjere da kućne instalacije održi u ispravnom stanju.

(3)U slučaju neizvršenja obaveze iz stava (2) ovog člana, nastali gubici i troškovi padaju na teret korisnika.

Član 24.

(Obaveza ugradnje vodomjera)

(1)Korisnici lokalnih vodovoda izgrađenih do dana stupanja na snagu ove Odluke, koji su priključenje na lokalni vodovod izvršili bez ugrađenog vodomjera i bez priključka na javni sistem odvodnje otpadnih voda ili izgrađene septičke jame, dužni su o svom trošku ugraditi vodomjer, odnosno izvršiti priključenje na javni sistem odvodnje otpadnih voda ili izgraditi septičku jamu.

(2)Ukoliko korisnik lokalnog vodovoda iz stava (1) ovog člana ne izvrši obavezu iz stava (1) ovog člana u roku predviđenom ovom Odlukom, komunalni inspektor donijet će rješenje kojim mu zabranjuje korištenje usluge snabdijevanja pitkom vodom putem lokalnog vodovoda.

Član 25.

(Osiguranje uslova za održivost)

Grad je dužan da politikom cijena komunalne usluge snabdijevanja pitkom vodom putem lokalnog vodovoda osigura materijalne, organizacione i druge uslove za održavanje objekata i uređaja lokalnog vodovoda u funkcionalnom stanju i njihovo korištenje u skladu sa njihovom prirodom i namjenom, kao i čuvanje od uništenja, oštećenja i nenamjenskog korištenja.

Član 26.

(Rekonstrukcija i sanacija)

Na rekonstrukciju i sanaciju objekata i uređaja lokalnog vodovoda primjenjuju se odredbe ove Odluke koje se odnose na izgradnju tih objekata i uređaja.

DIO ČETVRTI - PRIKLJUČENJE NA LOKALNI VODOVOD

Član 27.

(Priklučenje na lokalni vodovod)

(1) Licima koja nisu sudjelovala u izgradnji lokalnog vodovoda može se odobriti priključenje na lokalni vodovod, na osnovu uvjerenja službe nadležne za poslove građenja i uplate priključka.

(2) Uvjerenje iz stava (1) ovog člana izdat će se ukoliko su dostupne količine vode za piće dovoljne da novim priključkom ne bude ugrožena opskrba postojećih korisnika, te ako se snabdijevanje vodom podnositelja zahtjeva ne može organizirati na drugi način uz iste ili manje troškove.

Član 28.

(Objekti koji se ne mogu priključiti)

Objekti kod kojih odvodnja otpadnih voda nije riješena na propisan način, ne mogu se priključiti na vodovodnu mrežu lokalnog vodovoda.

Član 29.

(Zaključenje ugovora)

(1) Lice kojem je odobreno priključenje na lokalni vodovod dužno je sa davaocem usluge, a prije početka korištenja usluge snabdijevanja vodom putem lokalnog vodovoda, zaključiti

ugovor kojim se reguliše njegova obaveza plaćanja troškova izgradnje sistema, upravljanja i održavanja, srazmjerno troškovima koje su postojeći korisnici usluge za te potrebe već snosili.

(2) Lice iz stava (1) ovog člana koje odbije zaključiti ugovor iz stava (1) ovog člana neće moći izvršiti priključenje na lokalni vodovod.

DIO PETI - UTVRĐIVANJE I NAPLATA CIJENE SNABDIJEVANJA VODOM ZA PIĆE

Član 30.

(Sredstva za obavljanje djelatnosti)

Sredstva za obavljanje djelatnosti snabdijevanja pitkom vodom putem lokalnog vodovoda obezbjeđuju se iz cijene komunalne usluge.

Član 31.

(Uplata cijene za korištenu vodu)

(1)Do preuzimanja lokalnog vodovoda na upravljanje i održavanje od strane Grada, odnosno do povjeravanja davaocu usluge, iznos cijene za korištenu vodu uplaćuje se na račun mjesne zajednice, jednako kao i uplate za ostale troškove održavanja sistema.

(2)Cijenu vode iz lokalnog vodovoda pod upravom mjesne zajednice utvrđuje savjet mjesne zajednice odlukom.

(3)Cijena vode mora biti takva da pokriva troškove redovnog održavanja sistema i troškove amortizacije.

(4)Sredstva iz stava (1) ovog člana koristit će se strogo namjenski.

Član 32.

(Vođenje evidencije od strane mjesne zajednice)

(1)Mjesna zajednica vodi evidenciju korisnika lokalnog vodovoda, u koju svakog posljednjeg dana u tekućem mjesecu upisuje izvršenje ili neizvršenje obaveze plaćanja cijene za korištenu vodu za prethodni mjesec.

(2)U slučaju neplaćanja cijene za korištenu vodu utvrđenog u tekućem mjesecu za prethodni mjesec, mjesna zajednica upisat će zakašnjenje u evidenciju iz stava (1) i pisanim putem upozorit će korisnika na kašnjenje u izvršenju obaveze plaćanja, na upis kašnjenja u evidenciju, te na mogućnost prisilne naplate nakon preuzimanja sistema na upravljanje od strane Grada.

(3)Evidenciju iz stava (1) ovog člana mjesna zajednica predaje Gradu prilikom preuzimanja na upravljanje lokalnog vodovoda od strane Grada.

Član 33.

(Utvrdjivanje cijene isporučene vode za piće putem lokalnog vodovoda)

(1) Nakon preuzimanja od strane Grada i povjeravanja na upravljanje i održavanje lokalnog vodovoda subjektu u skladu sa odredbama 11. i 13. Zakona o komunalnim djelatnostima, cijenu za isporučenu vodu za piće putem lokalnog vodovoda utvrđuje, uz prethodnu saglasnost Gradskog vijeća, davalac usluge.

(2) Politikom cijena komunalnih proizvoda i usluga Grad mora obezbijediti takav nivo cijena komunalnih proizvoda i usluga koji će obezbijediti održivost, odnosno minimalno prostu reprodukciju javnom preduzeću.

DIO ŠESTI – MJERE ZAŠTITE LOKALNOG VODOVODA

Član 34.

(Zaštita izvorišta lokalnog vodovoda)

(1) Izvorište koje služi za snabdijevanje vodom za piće lokalnog stanovništva ne smije biti izloženo direktnim zagađenjima iz gradske kanalizacije, industrijske kanalizacije, deponije čvrstog otpada, gnojidbe poljoprivrednih površina, kanalizacija sa poljoprivrednih farmi, saobraćajnih površina.

(2) Ukoliko je izvorište čija je planirana namjena snabdijevanje vodom za piće lokalnog stanovništva izloženo nekom od oblika zagađenja iz stava (1) ovog člana, prije puštanja lokalnog vodovoda u upotrebu, moraju se poduzeti odgovarajuće mjere sprječavanja zagađenja izvorišta.

Član 35.

(Obezbjeđenje mjera zaštite)

(1) Davalac usluge snabdijevanja pitkom vodom putem lokalnog vodovoda je dužan obezbijediti odgovarajuće mjere zaštite na objektima i uređajima lokalnog vodovoda, u cilju njihove ispravnosti, funkcionalnosti i obezbjeđivanja propisanog kvaliteta pitke vode u skladu sa posebnim zakonima i tehničkim propisima i standardima, odnosno osiguranja objekata i uređaja lokalnog vodovoda kod odgovarajućeg osiguravajućeg subjekta.

(2) Pod mjerama zaštite iz stava (1) ovog člana podrazumijevaju se mjere fizičke i tehničke zaštite, zaštite od strujnog udara, zaštite od poplava, zaštite od požara i zaštite u slučaju potresa, a u skladu sa propisima koji regulišu te oblasti.

Član 36.

(Mjere zabrane na javnim česmama)

Zabranjeno je na javnim česmama pranje rublja i posuđa, kupanje, korištenje hemijskih sredstava za čišćenje u druge svrhe, te poduzimanje bilo koje druge radnje koja može nanijeti štetu zdravstvenoj ispravnosti vode za piće ili oštetiti ili uništiti ove objekte i pripadajuće uređaje.

Član 37.

(Mjere zabrane u cilju zaštite lokalnog vodovoda)

U cilju zaštite lokalnog vodovoda i dostupnih količina vode za piće sa izvorišta, zabranjeno je:

a) vršiti izgradnju nadzemnih i podzemnih objekata koji bi na bilo koji način mogli ugroziti izvorište i objekte lokalnog vodovoda;

b) na površini ispod koje su instalacije lokalnog vodovoda ostavljati otpad, posebno organskog porijekla, ispuštati otpadne vode, zakopavati leševe uginulih životinja i dr.;

c) mijenjati mjerne uređaje, vršiti popravke i rekonstrukcije na lokalnom vodovodu bez ovlaštenja;

d) ne poštivati propise o ograničenoj potrošnji i štednji za vrijeme dok traje propisana mjera;

e) na bilo koji način ugroziti kvalitet vode ili mogućnost snabdijevanja vodom.

DIO SEDMI – KONTROLA ZDRAVSTVENE ISPRAVNOSTI VODE ZA PIĆE

Član 38.

(Kontrola zdravstvene ispravnosti)

(1) Kontrola zdravstvene ispravnosti vode za piće podrazumijeva ispitivanje kvaliteta izvorišta, zdravstvene ispravnosti vode u vodnim objektima i vodovodnoj mreži, te kontrolu dezinfekcije.

(2) Kontrola zdravstvene ispravnosti vode za piće iz pojedinačnih vodnih objekata obuhvata lokalnu inspekciju vodnog objekta, kao i praćenje kvaliteta vode od izvorišta do krajnje tačke, odnosno do korisnika.

(3) Subjekt koji upravlja lokalnim vodovodom dužan je osigurati redovno vršenje kontrole zdravstvene ispravnosti vode za piće, u skladu sa odredbama Pravilnika o zdravstvenoj ispravnosti vode za piće.

(4) Troškovi kontrole zdravstvene ispravnosti vode za piće iz stava (1) ovog člana sastavni su dio strukture cijene usluge snabdijevanja vodom za piće.

DIO OSMI - NADZOR NAD PROVOĐENJEM ODLUKE

Član 39.

(Upravni nadzor nad provođenjem Odluke)

Upravni nadzor nad provođenjem određaba ove Odluke vrši služba nadležna za komunalne poslove.

Član 40.

(Inspekcijski nadzor nad provođenjem Odluke)

Inspekcijski nadzor nad provođenjem određaba ove Odluke vrši gradska služba nadležna za inspekcijske poslove, odnosno gradski komunalni i građevinski inspektor, svaki u okvirima svojih ovlaštenja.

DIO DEVETI - KAZNENE ODREDBE

Član 41.

(Prekršaji)

(1) Novčanom kaznom od 3.000,00 KM do 5.000,00 KM kaznit će se za prekršaj davalac usluge ako ne postupi u skladu sa odredbama člana 16. ove Odluke.

(2) Za prekršaj iz stava (1) ovog člana kaznit će se odgovorno lice davaoca usluge novčanom kaznom od 500,00 KM do 1.500,00 KM.

Član 42.

(Prekršaji)

(1) Novčanom kaznom od 1.000,00 KM do 3.000,00 KM kaznit će se za prekršaj davalac usluge ako ne postupi u skladu sa odredbama člana 20. ove Odluke.

(2) Za prekršaj iz stava (1) ovog člana kaznit će se odgovorno lice davaoca usluge novčanom kaznom od 500,00 KM do 1.500,00 KM.

Član 43.

(Prekršaji)

(1) Novčanom kaznom od 1.000,00 KM do 3.000,00 KM kaznit će se za prekršaj davalac usluge ako ne postupi u skladu sa odredbama člana 22. ove Odluke.

(2) Za prekršaj iz stava 1. ovog člana kaznit će se odgovorno lice davaoca usluge novčanom kaznom od 500,00 KM do 1.500,00 KM.

Član 44.

(Prekršaji)

(1) Novčanom kaznom od 1.000,00 KM do 3.000,00 KM kaznit će se za prekršaj pravno lice korisnik usluge ako ne postupi u skladu sa odredbama člana 24. ove Odluke.

(2) Za prekršaj iz stava (1) ovog člana kaznit će se odgovorno lice pravnog lica korisnika usluge novčanom kaznom od 500,00 KM do 1.500,00 KM.

(3) Za prekršaj iz stava (1) ovog člana kaznit će se fizičko lice korisnik usluge novčanom kaznom od 1.000,00 KM do 3.000,00 KM.

Član 45.

(Prekršaji)

(1) Novčanom kaznom od 1.000,00 KM do 3.000,00 KM kaznit će se za prekršaj mjesna zajednica ako ne postupi u skladu sa odredbama člana 32. ove Odluke.

(2) Za prekršaj iz stava 1. ovog člana kaznit će se odgovorno lice mjesne zajednice novčanom kaznom od 500,00 KM do 1.500,00 KM.

Član 46.

(Prekršaji)

(1) Novčanom kaznom od 3.000,00 KM do 5.000,00 KM kaznit će se za prekršaj davalac usluge ako postupi suprotno odredbama člana 35. ove Odluke.

(2) Za prekršaj iz stava 1. ovog člana kaznit će se odgovorno lice davaoca usluge novčanom kaznom od 500,00 KM do 1.500,00 KM.

Član 47.

(Prekršaji)

Novčanom kaznom od 500,00 KM do 1.500,00 KM kaznit će se za prekršaj fizičko lice koje postupi suprotno zabrani iz člana 36. ove Odluke.

Član 48.

(Prekršaji)

(1) Novčanom kaznom od 3.000,00 KM do 5.000,00 KM kaznit će se za prekršaj pravno lice koje postupi suprotno nekoj od zabrana iz člana 37. ove Odluke.

(2) Za prekršaj iz stava 1. ovog člana kaznit će se odgovorno lice pravnog lica novčanom kaznom od 500,00 KM do 1.500,00 KM.

(3) Za prekršaj iz stava (1) ovog člana kaznit će se fizičko lice novčanom kaznom od 500,00 KM do 1.500,00 KM.

Član 49.

(Prekršaji)

(1) Novčanom kaznom od 1.000,00 KM do 3.000,00 KM kaznit će se za prekršaj davalac usluge ako ne postupi u skladu sa odredbama člana 38. ove Odluke.

(2) Za prekršaj iz stava 1. ovog člana kaznit će se odgovorno lice davaoca usluge novčanom kaznom od 500,00 KM do 1.500,00 KM.

DIO DESETI - PRIJELAZNE I ZAVRŠNE ODREDBE

Član 50.

(Rok za pribavljanje odobrenja za građenje)

Za preuzete lokalne vodovode i javne česme, za koje ne postoji odobrenje za građenje i odobrenje za upotrebu, Grad je dužan pribaviti takva odobrenja u roku od jedne godine od dana stupanja na snagu ove Odluke.

Član 51.

(Povjeravanje na upravljanje i održavanje)

Grad je dužan preuzete lokalne vodovode i javne česme povjeriti na upravljanje i održavanje nekom od subjekata u skladu sa članom 11. i članom 13. Zakona o komunalnim djelatnostima u roku od 3 mjeseca od dana preuzimanja, odnosno od dana pribavljanja odobrenja za građenje za lokalni vodovod ili javnu česmu.

Član 52.

(Rok za ugradnju vodomjera)

Korisnici lokalnih vodovoda izgrađenih do dana stupanja na snagu ove Odluke, koji su priključenje na lokalni vodovod izvršili bez ugrađenog vodomjera i izgrađene septičke jame, dužni su o svom trošku ugraditi vodomjer i izgraditi septičku jamu u roku od jedne godine od dana stupanja na snagu ove Odluke.

Član 53.

(Stupanje na snagu Odluke)

Ova Odluka stupa na snagu osmog dana od dana objavljivanja u “Službenom glasniku Grada Bihaća”.

Gradsko vijeće

Broj: _____/21

Bihać, _____2021. godine

Predsjedavajući Gradskog vijeća

Zulfikar Handukić